

欽
定
全
唐
文

欽定全唐文卷八百七十八目錄

徐鉉一

頌德賦

木蘭賦并序

新月賦

劍池頌并序

保寧王制

南昌王制

張居詠制

撫州節度使馬希崇除舒州節度使制

太弟太保馮延巳落起復加特進制

林仁肇浙西節度使制

紀國公封鄧王加司空制

上太后尊號制

太子少傅徐運授太子太保制

朱業江州節度使制

朱業宣州節度使制

泉州節度使畱從効檢校太師制

右揆嚴續除司空兼門下侍郎平章事制

信王改封江王加中書令制

謝匡策加特進階增食邑制

鄭王加元帥江寧尹制

朱業加中書令宣州節度使制

欽定全唐文卷八百七十八

徐鉉一

鉉字丹臣會稽人初事吳爲校書郎後事南唐累授太子
右諭德知制誥遷中書舍人後主時除禮部侍郎翰林學
士御史大夫吏部尚書隨後主入宋歷左散騎常侍貶靜
難行軍司馬卒年七十六

頌德賦

東宮生日獻

伏惟先王之建國體皇極而垂制仰則觀於辰象俯則察
於地義前星爲帝座之輔蒼震乃少陽之位非明德與茂

親不足膺茲主器故萬邦以貞而本支百世是必天錫嘉
祉神輸百祥山河資其正氣日月分其融光膺期運以載
誕配乾坤而永昌者也惟我儲后昭明俊德黃裳元吉沉
潛剛克鉤深致遠曾莫挹其津涯問安視膳每或形於顏
色在昔沖讓高追太伯乃剖麟符保釐東宅受道師傳稽
疑典冊化自誠心風行邦國乃擁千旌南徐之城左撫勾
吳前對敬亭京師河潤盛德日新其畏如夏其惠如春謝
傳圍碁靜一方之沴氣條侯高臥息萬里之驚塵今聞孔
昭元功莫二人情不可以久鬱皇統不可以終避乃畏天

命允茲儲貳鳴玉軌以徐來與春郊而總至龍樓霧廓雞
戟風生珍符疊委和氣交迎百度以之而式序多壘以之
而載清史書有年衢傳頌聲豈人事之協贊信宗祏之降
靈於是元圃凝陰瑤山密雪宣猷之緹幕半下濛汜之層
冰乍結爰書慶誕之日始遇嘉平之節麗正晨啟重明夙
設調護之客娛侍之臣莪冠煒煜佩玉璘玢咸稽首而再
拜獻多福於萬春有宮坊之下吏乃捧觴而進稱曰自古
聖賢率由輔導伊徇名與課實故成敗之異效粵若成王
史佚周召左右前後惟仁與孝靡過不舉無善不告茲君

臣之一體故風聲之克劭降及後代亦慎厥初實聘四老
復延二疏咸由古道以佑皇儲若乃征和戾園有思臺博
望之盛貞觀承乾有元齡魏徵之重或有其禮而無人或
有其人而不用何擇禍之忘輕信非賢而罔共英英副君
鑒古知今百揆在乎手萬務經其心朝廷之所寄者重蒼
生之所望者深旣賞興王之諫亦訪百官之箴故曰生民
在勤好問則裕不躬不親人將孰信一游一豫樂有常度
節八音以導其和平調五味以適其喜怒情義兼於家國
故知無不爲愛敬極於君親故惟道是諭儉以足用而施

舍不可不行仁以接物而刑罰不可不具冗官宜省而才不可遺疆事漸寧而備不可去居安思危觀災而懼上分一人之憂以成天下之務俾中外之禔福與宗祧而永固伊下臣之不佞蒙國士之殊遇實含和而吐頌豈登高之能賦願降鑒於芻蕘庶效誠於塵霧

木蘭賦

并序

頃歲鉉左宦江陵官舍數畝委之而去庭木蘭因移植於宗兄家及鉉徵還席不遑煖又竄於舒庸吾兄感春物之載華擬古詩而見寄吟玩感歎謹賦以和焉雖不足繼體

物之作庶幾申騷客之情爾

伊庭中之奇樹有木蘭之可悅外爛爛以凝紫內英英而積雪芬芳兮謝客之囊旖旎兮仙童之節許蒲葦之竊比聽蘭芽之並列於是辭下土之卑濕厯上京之繁華恥銜價於豪門乃托根於貧家資幽人之賞豫有好事之稱嗟一旦逐客程遠君門路賒削閨籍與印組豈獨畱乎此花意人屢遐棄花猶得地分兔苑之餘蔭向藩房而吐媚授簡多暇攀條屬思持香草以余比效騷辭而我寄感此生之百憂何斯物之足貴悲夫館客長吟山城夕陰想馨香

之不改歎歡宴之難尋憑歸夢於飛翼寫商歌於素琴歌
曰光景兮愁暮別離兮易久真宰兮無黨貞心兮不改誠
知異日重滋田氏之荆但恐相逢共歎桓公之柳

新月賦

庚午歲徇直作

五月五日繁陰乍晴倬彼新月麗於太清映玉繩而絢彩
拚銀漢以騰精對鳩鵲西南之影步明光東北之楹厯厯
遲漏悠悠我情雖萬古之不易感一年而始生乃有騃女
癡男朱顏稚齒欣春物之駘蕩登春臺之靡迤雜佩璀璨
輕裾颯颯紛乎拜祝怡然宴喜人歲歲以潛換景年年而

若此昔我當年胡云不然世路多故流光暗遷易壯心於
大觀變元髮於華顛顧一毛之無濟愧兩綬之徒然况平
萬象虛明九門奧祕對宣室以方罷閔通宵而不寐憂心
似醉既慷慨於君恩急景如馳更悽涼於往事想翹月以
長歌遂抽毫而見意

劍池頌

并序

歲次辛酉月躔仙冬王人徐鉉揚旂銅柱之鄉稅駕劍池
之廟慨嘆靈迹徘徊故墟或曰龍泉太阿安得爲寶出也
不爲當世之用佩之不免亡身之災天下固有虛名而無

實效者歟愚以爲不然夫聖人之於天下亦物耳所稟受者異故能與造物者並而爲天下王是以聖人之作也天不愛其道地不愛其寶同聲相應同氣相求人謀鬼謀皆爲聖人用無功無迹豈尋常所能識乎然則集陰陽之英萃山澤之精窮爐冶之妙極鋒銑之利宜其冥合元造弼成聖功者也昔黃帝法月滿而鑄鏡用能照燭怪魅辟除不祥大禹收貢金以鑄鼎使民知神姦以遠不若漢高祖佩斬蛇之劍以撥亂除害奄有天下是三者皆人力之所爲也咸能輔佐興運與時隱現其可誣乎在昔三分叔世

咸有昏德天命將改寰宇混同斯劍知之故靈發於下氣
浮於上應帝王之符命矚識者之觀瞻亦猶伊尹負鼎於
莘墟仲尼動色於魯相千載一會聖賢所以汲汲也向使
晉武能誕若天意克明俊德判忠邪之路絀驕侈之心則
賢能盡其才神靈効其用淳耀之烈可續七百之期不爽
而皇猷旣鬱亂本斯成百姓失望羣龍沮色於是斯劍也
委質張雷之鑑一泄其憤遠迹劉石之醜復歸於潛其出
也所以示神之不測其去也所以示惟德是依則其爲用
也遠矣昔者周過其數秦不及期是知天命之精微可以

人事而延促前哲論之備矣若夫精真之誠修於內感召之致應乎外自然而然有道存焉不可以智求不可以言達王者得之則三五之功其餘事耳然則天下至寶本非人臣所服變化無方神物之事也忘身殉節忠臣之烈也兩造其極求仁得仁復何怨哉廟在豐城故縣俯瞰池岸壯武侯雷府君之像祀焉去今縣四十里而龍泉太阿之廟別在中路棟宇綿久皆將傾頽邑人朱輝等洽重熙之化感百世之祀獎率同志唯新壽宮千載光靈煥然如在縣令孟賓于尉孫舉皆以文行之懿中賢良之選接武連

事惠此王畿推誠於民薦信於神風雨不愆耕鑿咸若先
賢遺躅其不泯也宜哉是池廣不終畝深才數尺父老云
近歲旦暮往往有雲霧蒙覆其中恍惚之理不可測已今
中興三葉聖政惟新豈非靈命孔昭元貺將集天命不僭
宏之在人使臣司言敢告有位乃爲頌曰

周室旣衰仁獸率臻晉祚不融龍劍効珍神化無方天命
無親德之不建與運俱淪歸潛厚載以俟真人惟劍之神
惟賢之識湛湛靈沼綿綿廟食瑞氣長在元符靡測垂茲
頌聲永永無極

保寧王制

門下昔先王聰明時憲文質載周親親之義莫之或改乃
知封建之重宗社攸賴友愛之美風教代宣寅奉舊章敢
忘循舉二十弟某稟質冲粹慎德孝恭出言有章好學不
倦故我文考慈訓備隆而能踐修嘉猷惠迪前哲卓爾令
器時惟老成粵予眇冲肇當纘服賴貽謀之啟後仰垂鑒
之在天尚念多艱懼弗克荷是用睦懿親以佑涼德班宗
彝以懷萬邦錫爾以山川表爾以車服師長之任申而寵
之敦敘之恩於是乎在吁苴茅侯社禮莫縟焉連華棟萼

親莫昵焉履信思順可以無悔尊師重道可以多聞盡愛敬以奉親顏極惠和以厚宗室勿佻勿墮有初有終服我訓詞永光懿烈可

南昌王制

門下昔西周之分陝服則曰風聲所存南朝之治揚州則曰本根攸寄非親賢碩望不足以表東夏非輔相重位不足以副具瞻天下爲公百王不易肆子敷命匪敢有私長子某敦信厚之風秉孝恭之德凡迪前烈率由生知自剖麟符往綏淮甸尊敬師保奉行詔條有所問而不干知爲

善之最樂東楚之俗向風而安時以爲能朕亦自慰夫陟
明賞善有國大典苟得其所雖親何嫌是用特就畱臺寵
開相府崇貴之數儀制存焉噫爲政無他勤則有繼舉德
甚易終之實難無以安佚自居而忘夙夜之戒無以驕貴
自負而忽藥石之言治亂善敗則有先聖之遺經憲章文
物則有中朝之成式詔訪佩服身先行之敬哉慎哉無忝
多訓可

張居詠制

門下昔在先王任賢尚齒出將入相所以任賢也尊師重

傳所以尚齒也况乎擇藩屏之寄膺轉導之求高步承華
誕揚師訓克堪其選我有人焉某負貞幹之才稟純厚之
德亟更庶尹厯事累朝昇元始基賴其獻納故陟鸞臺之
位爰立作相保大踰歲藉其綏懷故委龍節之權受脤于
社懋乃嘉績叶於朕心殿邦政成輯瑞來覲方圖位著爰
得僉諧而昔自故相已嘗爲保重煩耆德俾傳東朝尊敬
之儀典章斯在噫昔者叔孫疏廣善於其職克繼來躋可
不慎哉勉著嘉猷以副時望可

撫州節度使馬希崇除舒州節度使制

門下姬周同德曹叔封於王畿炎漢功臣楊僕恥居關外
是知藩翰之重所寄必同遠近之差以斯爲寵我有成命
爾其敬聽某識度恢宏風猷茂遠象勲蓋世不怙貴以驕
人多難薦臻每忘身而濟物知能適變仁足亢宗來庭不
俟於七旬保境豈徒於五郡劉總舉全燕之地宏正翰推
魏之邦故實攸存懋章何恡是用加之飫賜尊以上公陟
負璽之崇資委建身於列鎮虛襟而見前席與談言語有
章威儀可則旣叶跂予之望且堅戀闕之心藹爾誠明形
於表疏愈歎忠勤之操宜更節制之權而永泰全軍舒庸

舊國地望無慙於汝水封疆密邇於王城用諧日近之言
尚資河潤之福俾迴新命往受中權於戲大義昭彰朝恩
渙汗千里之地可以觀政三軍之帥可以圖功永樹風聲
無忘多訓可

太弟太保馮延巳落起復加特進制

門下爵賞之行憲章斯在急於務則適其變終其事則歸
於禮將軍重任足以奪孝子之情特進崇班自昔冠諸侯
之上申爲懋典允屬公才某官馮延巳儒雅積中機神應
物風雲夙契魚水冥符處多士之朝副具瞻之望及移相

府出鎮臨川封境綏懷聲猷茂遠頃集蓼莪之痛俯從金
革之權露冕有誠輯瑞來覲疇咨舊德保佑東朝北疏傳
之在前允諧擬議類魯公之拜後適就變除倬進崇階庶
申優寵於戲將相之重資爾以惟聖儲兩之尊繫爾以成
德知人則哲予用弗疑勉揚令圖無忝多訓可落起復冠
軍大將軍加特進餘並如故

林仁肇浙西節度使制

門下建侯樹屏有國之攸先崇德報功百王之所共斯爲
令典予敢忘之鎮海軍節度浙江西道觀察等使畱後金

紫光祿大夫檢校太傅濟南縣開國伯食邑七百戶林仁
肇稟此星芒鬱爲時幹鼓輦之氣指勅敵而愈高金石之
心因時艱而益壯故能灼殊功於南部夷多壘於東門元
戎所行績用昭著及總畱務於浙之西成師著無犯之威
察俗有惟清之化屹爾京口殷然長城予惟汝嘉俾正藩
守因爾才畧樹之風聲雄師大邦所以屏王室尊官盛典
所以懋官成惟惠惟和有嚴有翼使予無東顧之慮者緊
其賴焉克堅一心以永百祿可依前檢校太傅兼御史大
夫使持節都督潤州刺史充鎮海軍節度使浙江西道管

內管田觀察處置等使功臣散官勲封如故

紀國公封鄧王加司空制

門下宗子維城良臣惟聖故有王社之數鼎司之權親親
賢賢古之大訓也我有成命時惟至公第七子某識度淹
通器質清粹就傳之歲威儀不忒出閣已來聞望所著向
由邦政入踐中樞內形將順之規外盡彌綸知業人知親
附俗待和平邦家之基斯實攸賴今六駢巡守萬乘啟行
方資扈蹕之勤宜有酬庸之典畫南陽而錫壤掌邦土以
命官併加馭貴之資益峻具瞻之望於戲義極君父愛敬

之道兼焉任綜文武弛張之政存焉爾其佩服前訓咨詢
舊德勿驕勿惰有初有終永樹風聲以保元吉

上太后尊號制

門下膺昊天之眷荷宗社之重何嘗不嚴奉慈訓聿循孝
理所以化成天下宏濟多艱親親尊尊教之大者也況沉
潛之德丕顯於國風輔佐之勤光昭於王業今遺恩累洽
靈鑒在天俾予小子恭踐大寶思宏任姒之烈紹恢三五
之基彝章盛典敢忘祇奉宜上大行國主皇后尊號爲太
后

太子少傅徐運授太子太保制

門下崇德尚賢推恩錄舊茲惟令典允屬時英予以眇躬
嗣承丕業戚藩之望羽翼之恩敢忘寵章用光師道某清
直稟氣忠厚爲資實戚里之所榮厯累朝而見重敬愼卽
保家之主恭儉無出位之思爰自京口臨藩克貞師律鸞
臺作相足厚時風畱侯旋務於退身疏受更聞於稱職純
誠益著雅望攸高昨者預奉綴衣導揚末命忠貞以濟典
禮無違顧惟沖人懼德弗嗣當此承祧之日益堅重傳之
懷是用就改崇資仍加食賦於戲班崇一品秩視三師苟

非賢臣孰克臻此永期納誨無替令猷可

朱業江州節度使制

門下古者諸侯之賢入爲卿士上公之寵出爲方伯故中外之任踐更攸宜我有勲臣咸曰名將藩維宿衛夾輔冲人肆予仰成是用申告某家傳武畧天賦純誠名因勇聞位以材致周旋數紀佐佑累朝由裨將以統元戎勲勞滋茂自百城而登連帥聲政治聞寵益盛而若驚位益高而愈讓予纂服之始駿奔來朝且堅戀闕之心因處周廬之任忠貞彌固夙夜惟寅輦下肅清時乃之力永言舊德豈

忘予懷會九江元侯入奉朝任中流之寄非賢不居是用
輟蘭錡之權付金符之重往分巨屏更佇殊庸噫簡師旅
以壯軍聲明紀律以宣庶政可畏可愛富之教之是汝所
長無替前效陟明有典厥惟欽哉可

朱業宣州節度使制

門下車服之寵所以報功藩閫之權可以觀政茲爲令典
允屬信臣某智勇推高忠貞特立秉武經以致用服戎政
以居多誠惻洞然終始一揆及分符出守持節主畱恩信
並行詔車畢舉肅連營而無犯視赤子以如傷所臨之方

去思仍在向鍾多難入衛京師憂國忘家令行禁止羣情
自固戎事以寧肆予仰成時乃之力今疆場甫靜蒸黎未
康宣城與區國家巨屏方當謀帥是用策勲資果毅以壯
先聲假惠和而蘇疲俗付爾節鉞往鎮撫之惟爾慈儉足
以安民剛正足以行法必當望風自理投刃皆虛宜宏寬
大之視以集中庸之德勉茲具美永振嘉猷可

泉州節度使畱從効檢校太師制

門下望高於朝則享師保之任惠加於物則進土田之封
所以啟佑沖人藩屏王室者也我有寵數屬於元侯某山

嶽儲精星芒稟異挺全才而應用激大義以致身而自際
會先朝奮揚奇策靜二方之多難越萬里以來庭故得倚
作藩宣誓之帶礪而能恩威洽著紀律修明戎政有經理
聲日遠黎獻有不欺之頌朝廷無南顧之憂茂績忠規古
難其比粵予眇質嗣德弗明賴我友邦越乃賢帥推誠翼
戴克荷景靈渙汗之恩唯恐不至是用增以井賦崇爲太
師美號峻階併伸殊渥噫乞言之禮可以觀德殿邦之寄
可以樹勲勉揚令圖永錫繁祉可

右揆嚴續除司空兼門下侍郎平章事制

門下天作司牧必生丞弼非君臣同體道則不明非律呂
交感功則不濟粵予眇質負荷景重不有時賢豈戡多難
敬若先意疇茲舊臣某純粹炳靈惠和成性襲台鼎之慶
連肺腑之親歷奉累朝亟更庶尹憂國家之事知無不爲
經夷險之間中立不倚言必由於忠信行必自於誠明勞
而弗矜謙以自牧先朝鑒其誠志任以腹心頃當巡守之
初俾貳主畱之寄盡規竭慮夜思晝行京輔以寧時乃之
力及奉揚末命以佑沖人送往事居禮無違者忠勲茂績
人無間然今二后在天萬物思理予方乃眷民亦具瞻是

用命作司空倚爲左相兼國史樞機之任進升階食賦之
資豈曰寵章是同憂責嗚呼受遺作弼厥惟艱哉爾其崇
遠大之謨布簡寬之政詢箴諫之士塞便佞之言滿假自
賢則其智益蔽虛懷接物則其猷益光念茲在茲以底於
道可

信王改封江王加中書令制

門下唐堯之聖也旣以序九族爲先漢祖之隆也亦以守
四方在念矧予小子弗堪多艱實賴羣后共康烝民粵有
賢侯亦在諸父庸勲表德敢或愛焉第二十叔某天賦機

神生知禮樂肇開朱邸則孝敬之道升聞出建齋壇則威和之風遠振况五嶺之際俗雜地雄吏服其明民安其教煦如冬日隱若長城孤以不明祇奉丕業咨乃庶尹至於友邦師保之規既自家而刑國蓼蕭之澤當由親而及遠是用正左相之位崇三司之儀增賦進封併伸寵數於戲昔我文考並建懿親藩屏所繫社稷是衛燕翼之旨可不勉歟敬佇嘉猷以永繁祉可

謝匡策加特進階增食邑制

門下王者均慶推恩無遠弗及矧有舊德居然將臣方申

求舊之懷豈恡疇庸之典某素推勇氣夙負壯圖立功旗
鼓之間發跡風雲之會出分符竹入守關防翼衛天門董
齊蘭錡咸著在公之績可觀適用之材享此期頤保茲優
逸臻富壽之福全終始之名比之古人不可多得孤以眇
質嗣守慶基方資無改之規式重後彫之節俾升階序仍
進戶封於戲二品崇資三朝貴仕人臣寵祿何以過斯勉
荷朝恩永揚令聞可

鄭王加元帥江寧尹制

門下睦親尊賢王者之盛業也中台上將有國之重任也

是必疇咨公議稽若前經舉而行之謂之令典我有愛弟
時維宗英論道經邦勲德滋茂肆予有命允叶厥中某挺
命世之才秉生知之哲機神穎邁器宇冲深自寶玉分封
緇衣授職內蘊清明之德化宣寅亮之功持謙下之資以
親附百姓體勤儉之節以表率時風學問該通每諮詢而
自益忠誠孝悌常將順以無違昔者三后叶心十亂同德
允茲古義非爾而誰粵予眇躬惠迪先訓獲守大業汔臻
小康實繫手足之賢以集股肱之寄無德不報雖親何嫌
是用誕舉渥恩就加名數夫元帥者民之司命中樞者國

之宗臣尹京所以表則四方增封所以藩輔王室毗倚之
重何以加斯於戲義兼國家權總文武動靜之際治亂繫
焉所先者在乎弼諧所慎者在乎聽受清如止水故是非
之說不可欺平如懸衡故善惡之徵不能惑有犯無隱非
好異也不違如愚非苟合也惟公是務惟道是從所務必
老成所親必端士服茲多訓永樹英聲可

朱業加中書令宣州節度使制

門下子嘗顧藩屏之重思黎獻之康欲使折衝之威迭行
於封畧惠和之化普及於方州旣報政之屢聞乃改轅而

數寵咨爾賢帥聽吾話言某武毅致身忠厚成性踐更事
任昭著勲庸倚若金湯誓之帶礪自持使節出鎮中流恢
簡易之風立嚴明之令仁而有斷吏不敢欺故使萬井阜
安連營輯睦藹爾殿邦之績叶予進律之文率是通才何
適不可予以宣城列鎮旬服輿區久闕元戎未孚王化藉
爾有成之政副吾共理之懷右相之崇宰司所重申爲殊
獎以極朝恩於戲有惠於民有功於國中台貴位累鎮劇
權苟非純誠何以臻此爾尚守益恭之節勵匪懈之心永
懋嘉猷以光時望

欽定全唐文卷八百七十九目錄

徐鉉二

左司郎中陳繼善可工部侍郎制

馬在貴加官制

游簡言左僕射平章事制

李匡明御史大夫等制

宋齊邱知尚書省制

劉崇俊等起復制

馮延魯江都少尹制

金定合庫三
卷一百一十一
王彥儔加階制

李匡明舒州刺史制

趙丕御史中丞制

陳袞衛尉卿制

杜昌業江州制

招討妖賊制

魏王宣州大都督制

王崇文劉仁贍張鈞並本州觀察使制

高逸休壽州司馬制

宣州營田副使兼馬步都指揮使李萼可節度副使罷軍職制

駕部郎中馮延巳兼起居郎屯田郎中閤居常兼起居舍人制

馮偁可祕書省正字制

侍御史王仲連可起居舍人監察米崇楷可右補闕制

水部員外郎判刑部查文徽可侍御史知雜制
左常侍張義方可勤政殿學士制

楚州刺史劉彥貞可本州觀察使制

外祖母追封某國夫人制

大理卿判戶部刁紹可工部尚書制

兵部侍郎張義方可左常侍制

太常少卿李貽業可宗正卿制

水部郎中判刑部蕭儼可祠部郎中賜紫制

屯田郎中李景進可工部郎中制

大府卿張援可司農卿兼大理寺事制

權知江都令李潯正授制

和州司馬潘處常可金部郎中制

浙西判官高越可檢校水部郎中賜紫制

安陸郡公景達檢校司空太府少卿制

保定郡公景迪可朝散大夫檢校左僕射賜紫制

右拾遺鄭延樞可清江縣令賜緋制

浙西判官艾筠可江都少尹制

閩度可江寧府參軍制

欽定全唐文卷八百七十九

徐鉉 二

左司郎中陳繼善可工部侍郎制

勅國有六職百工與其一焉我朝已來其選尤重矧自尚書郎而擢拜者不其鮮歟某官陳某以幹蠱之才克構之美亟更庶尹遂歷省垣委之以繁雜之務而事益明兼之以權筦之司而利不匱宏羊心計亦莫加焉屬朕出震嗣圖施令布慶二卿之任頗難其人今以繼善爲之爾其可以稱職噫大僚之體存乎簡易與利之要在乎廉平無渝

乃誠以撓吾法可

馬在貴加官制

門下盡忠於國者其報深有勞於事者其澤厚方切念功之義仍當均慶之初不有寵章孰先懋典馬某深沉有勇質重寡言少推學劍之能早識擇君之舉自策名旗鼓受任疆場履險身先有功不伐向分符竹實制要衝化行於富庶之時節著於艱難之際純誠懿績時論多之入總禁營遂成優秩富壽之福無關敬慎之風愈高予惟汝嘉思有以勸屬此推恩之際俾升掌武之資噫忠勲旣明寵祿

亦至終始之義古今所高勉揚令猷以享元吉

游簡言左僕射平章事制

門下昔在明王膺圖嗣統雖復格天光表繼文下武猶曰
實相以濟又曰克艱厥臣矧惟寡昧疇咨庶尹若乃承弼
之重毗倚之隆詢於具瞻敢或經授游某世濟文雅挺生
公器中興之始卽爲辭臣重熙在運亟更近署忠爲令德
實浮於名藹然直聲允洽時望先皇帝省方展義分命羣
司藉爾重臣輔予小子直躬無避正辭不諂翊從行闕克
申其勞至於受命交兵之間抗節履危之際繇義以濟知

無不爲此皆古之所以爲艱予之所以爲尚者也間歲出於獨斷命長南宮議者但高其盡公之誠未許其理劇之用遂能正身而令當官不迴厲風霜之威以糾其慢堅夙夜之節以率其勤請託不行紀綱自舉羣議由是咸伏六職以之孔修風雨不渝始終一致實爲國器想見古人而躬親簿領之間遽成勞勩從容廟堂之上未盡謀猷酬庸之典予所多愧是用命作左相陟茲鸞臺進金紫之崇階典圖書之祕府勲爵并賦併示寵名於戲釋細務足以導節宣之和恭大政足以暢彌綸之業繫爾致君之效成我

知臣之明往維欽哉無假多訓可

李匡明御史大夫等制

勅御史所職實爲紀綱百官之邪得以歸正衆目不理得以舉明使朝廷凜然罔懈於位茲朕之攸賴而和庶政也向者治刑不暇官業靡申遂用省其訛鞠之煩委以澄清之寄庶循理本諒在得人通議大夫守吏部尚書柱國賜紫金魚袋隴西縣開國子食邑五百戶李匡明學術優深德望清重可副丞相以鎮時風中散大夫守右常侍判御史臺事柱國賜紫金魚袋趙丕自掌憲司克勤於職而侍

從之列朝夕論思期於弼違宜在專任令以庶獄移從理
官可歸騎省以備顧問各踐乃位允期懋功匡明可御史
大夫丕可守本官罷判臺事

宋齊邱知尚書省制

勅兩掖南官樞密之地也元台上公股肱之寄也况親賢
在位中外具瞻式敘彝倫爰申明命夫真宰之重大政咸
歸出納王言固當綜錄侍中壽王某向兼南省未叶舊章
宜罷判尚書省便領中書門下兩省事太保齊邱雖道在
經邦方資納誨而事殷會府兼藉允釐可知尚書省事大

元帥齊王總納百揆以貞萬邦凡曰謨猷悉關獻替其三
省事並取齊王參決朕允思恭已以荷景靈用一國之才
敢辭則哲成天下之務庶叶無爲方俟以沃心豈勞多訓

劉崇俊等起復制

勅匡時啟運功臣威邊將軍濠州都團練觀察處置等使
光祿大夫檢校太傅使持節濠州諸軍事守濠州刺史渦
口兩城使兼御史大夫上柱國彭城縣開國子食邑五百
戶劉崇俊濠上觀風克昭祖服光祿大夫檢校太保持節
常州諸軍事守常州刺史兼御史大夫上柱國劉佑晉陵

守土允茂政經而皆夙練軍聲習知邊要方深朝寄遽屬
內艱永言護塞之權宜舉墨緣之制俾加寵命改授階資
勉抑孝心以從王事並可起復雲麾將軍餘如故

馮延魯江都少尹制

勅朝議郎行尚書虞部員外郎武騎尉賜緋魚袋馮延魯
頃者尹縣畱都首變田制克勤於事以利於人自歸朝行
已踰周歲如聞衆庶未甚樂成矧彼浩穰所宜均一是用
假爾亞尹往畢舊功其在條理得中厚薄無撓俾乃比屋
咸遂所安止於刑讞之繁亦以公平爲用務令稱職無忝

加恩可以本官判江都少尹公事

王彥儔加階制

勅王者旌董戎之功重殿邦之任疏寵之命因事有加所以勸能而佇效也佐時衛聖功臣建威將軍康化軍節度池州觀察處置等使起復雲麾將軍檢校太尉兼侍中使持節池州諸軍事池州刺史上柱國太原郡開國侯食邑二千戶王彥儔作鎮方隅克揚威信師謀不撓庶政有常肅爾先聲宣我朝命向者起於哀制授以崇階禮適就於變除寄方隆於藩屏俾從增邑式示推恩勉揚令圖無替

丕績可光祿大夫加食邑一千戶餘如故

李匡明舒州刺史制

勅通議大夫守御史大夫柱國賜紫金魚袋隴西縣開國
子食邑五百戶李匡明向緣時望命長憲臺旣歷歲時亦
聞敬慎方佇茂績以光大猷遠親拜章固辭重位俾全寵
遇宜輟準繩尚賴分憂無忘守節可檢校司徒兼御史大
夫使持節舒州諸軍事守舒州刺史充本州團練使餘散
官賜邑如故

趙丕御史中丞制

勅朕以御史未理庶政靡清思得良臣副吾慎選中散大夫守右散騎常侍柱國賜紫金魚袋天水縣開國子食邑五百戶趙丕再履憲署欽若攸司迭爲侍臣匡予不及俾授格心之寄宜膺獨坐之權夫才識兼通然後能得大體公正無黨然後能肅百司糾正失中則紀綱撓顧避不言則職業墮爾其欽哉無辱朕命可御史中丞餘官勲賜爵邑如故

陳襄衛尉卿制

勅出身事主忠之効也以年致政古之制也淳風將振斯

道復行朕用嘉焉宜示優寵宣徽使某官陳襄以敬慎之
操俊乂之才輔予潛九之初叶我司總之寄出納惟允佐
佑盡規勤勞王家數紀於是永念耆德方注虛懷遽從知
退之言亟有懸車之請雖面諭難抑豈舊功可忘而司衛
列卿秩崇務簡俾退辭近侍猶在立朝勉迴高尚之心式
重君臣之義可衛尉卿

杜昌業江州制

勅十連之帥百城之長藩屏王室其揆一也隨時省置何
常之有焉朕祇荷慶基懋循古訓迭用舊德以頒詔條交

修予違踐更爾位肆因大慶式舉朝章金紫光祿大夫上
柱國京兆縣開國子食邑五百戶杜昌業始以明敏肅恭
服勞近密出納惟允固慎無違先帝用能委之邦政明九
伐以恢王畧堅一心以迪大猷六事允諧時乃之用將圖
爾効且盡其才朕以中流之寄九江爲重控五嶺之衝要
鎮百蠻之驛騷屬予相臣入總樞務惟爾公望克嗣其勲
是用輟夏官之崇膺外臺之職尚虛使節以便理戎其往
慎乃終遵我成憲簡易以申令恩信以卽師惟惠惟忠無
忝朕命依前檢校太保兼御史大夫使持節江州諸軍事

江州刺史本州團練觀察使散官勲如故

招討妖賊制

朕聞先王之靜人也四夷咸賓尚先慎德之誠一夫不獲則軫納隍之心是故導以仁聲浹之惠澤猶不可化遂威有刑昨者嶺表遺氓聚爲寇盜違其上命犯彼戰鋒而敢乘我國哀伺我邊隙侵迭我封部誘惑我黔黎保據谿山肆爲剽掠朕以肇膺丕業先洽德音矧彼狂徒皆吾赤子弗忍盡殺冀其自新所以雖命師徒且令招撫而克愚不革結聚愈忝暴害吏民攻圍縣邑一至於此其能久乎國

有常刑吾又何愛仍聞衆軍致討累有殺傷平人無辜暴骨於野興言及此永惻朕心况常賦及期三農失業特申矜恤更示懷來處州今年應屬省租稅並可放免仍委諸縣長吏安存編戶宣示國恩防護警巡勿令擾動妖賊張茂賢首爲刦盜罪在難容若能束身歸降亦與洗滌收錄如聞命之後因循未寶卽令招撫諸軍分路進討如所在百姓及徒黨中有能擒斬茂賢者不計有官無官並賜三品賞錢一萬貫莊一區并已分產業並永放苗稅差役傳之子孫此恩不改若能同心計畫及數內或擒獲得稱王

稱統軍軍使之屬并次第首級止於一隊一寨頭領者卽約此例等降優賞放免苗稅差役或能自出身歸投有田畝者各令歸業仍放三年賦租無田者委本道錄奏名與逐便優穩安排及重加賞賚如克惡不回爲諸軍擒獲者不問人數卽便處斬明申威信汝自擇焉諸軍將士有能斬獲茂賢殺戮反黨官賞之制並越常規予不食言爾宜自勵朕永惟止殺許彼悛心且妖賊等燒毀倉儲蹂踐禾稼聚食則資糧立盡外取則穀實不收進則大軍扼其前退則領兵掎其後況烏合之衆本不同心緩則苟避征租

急則各圖恩賞函首來獻翹足可期咨爾羣黨等自保家鄉共思寧息與其碎身於鋒刃孰若樂業於閭里咨爾將士等各奮驍雄早成功績與其暴師於境上孰若受賞於轅門體我深懷速清邊徼布告本道咸使聞知

魏王宣州大都督制

勅惟先王體國經野建邦設都並立懿親以藩王室當畿服之地則任輔翌之重有戎昭之績乃增督護之威是以王畧恢而諸侯和矣宣城重鎮陪京之南制天險之津梁據三楚之襟帶境環千里邑聚萬民我朝以來戎寄尤切

太師魏王受鉞先帝建牙是邦宣導皇風董齊師律生植
茂遂禮讓興行時惟懋功叶此時論粵朕小子懼德弗堪
允孚大猷其在叔父雖師保之命已迪茂章而刺舉之名
未極公望宜升大府式壯中權於戲立愛之恩予不敢怠
敬保之義王其謂何勉啟乃心以底於道可升宣州爲大
都督府以魏王爲宣州大都督府長史餘並如故仍編入
冊命宣降

王崇文劉仁瞻張鈞並本州觀察使制

勅守邊之要在乎崇垣翰而重威令也任能之方在乎因

善政而加寵秩也。懋迪斯道，時惟令猷。金紫光祿大夫、檢校太傅、使持節、吉州諸軍事、守吉州刺史、兼御史大夫、上柱國、太原縣開國男、食邑三百戶王崇文，儒雅飾身，威猛宣用。入奉旅賁之列，出申刺舉之能。光祿大夫、檢校太傅、使持節、袁州諸軍事、守袁州刺史、兼御史大夫、上柱國劉仁，瞻沉厚，有謀明斷，能理護塞之畧，歷任弗遷。光祿大夫、檢校太傅、使持節、歙州諸軍事、守歙州刺史、兼御史大夫、上柱國、清河縣開國子、食邑五百戶張鈞，踐履班行，昭著聲問，守土之効，一心靡違，而皆克嗣，乃勲誕揚我武，協比

成績勤勞王家朕以眇躬欽承鴻業實賴良將綏爰四方
肆於布慶之辰而有加等之命就升使職並駕兼車仍崇
馭貴之封增立將軍之號併申寵寄尚示克終無懈乃誠
以底於理陟明有典予不敢忘崇文可光祿大夫依前檢
校太傅使持節吉州諸軍事守吉州刺史兼御史大夫充
本路都團練觀察處置等使進封開國子食邑五百戶仍
賜號威勇將軍散官勲如故仁瞻可依前檢校太傅使持
節袁州諸軍事袁州刺史兼御史大夫充本州都團練觀
察處置等使封彭城縣開國男食邑三百戶仍賜號貞威

將軍散官勲如故鈞可依前檢校太傅使持節歙州諸軍事守歙州刺史兼御史大夫充本州都團練觀察處置等使進封開國伯食邑七百戶仍賜號武威將軍散官勲如故

高逸休壽州司馬制

勅朝議郎行袁州司馬賜緋魚袋高逸休立身謹行聞於朝廷負才好謙老於州縣先皇獎異錫以銀章優秩自居十數年矣其子焞秉乃直筆爲吾史臣適當均慶之初先有腰金之命而愛敬之切發於中誠乞循迴授之文庶遂

顯親之義辭旨懇激覽之惻然俾允所陳且成其美仍加
寵秩以就懸車噫望族舊人唯爾而已覩本朝之恢復拖
紫綬以優游孝子克家耆年致養茲惟盛事足慰爾心可
檢校尚書水部員外郎壽州都督府司馬致仕賜紫金魚
袋

宣州營田副使兼馬步都指揮使李萼可節度副
使罷軍職制

勅王者官人之旨必褒賢能而均勞逸也列辟垂憲予弗
之忘某官李萼夙負壯圖少爲裨將餘勇可賈有勞不矜

泗水剖符邊候寧晏宣城從帥連營輯和而將領之權久
煩耆德毗贊之任未極初筵俾援尚齒之文就疏加等之
命勉承朝獎無替忠誠可

駕部郎中馮延巳兼起居郎屯田郎中閤居常兼
起居舍人制

勅朕凝旒端冕以臨萬邦而左右史臣執簡近侍言動得
失注記無回故布政罔不臧承化罔不若惟聖攸賴慎簡
難虛某官馮延巳君子之儒多聞爲富發之爲直氣播之
爲雄文某官閤居常行顧樞機學臻精博得廷臣之體多

金定台月之 卷八 百一十一
長者之言而皆踐彼周行奉予元子或奏記有翩翩之譽
或礪礪多疊疊之談藹然清風叶此時望是宜兼領郎署
咸躋掖垣於戲君舉必書朕敢忘於恭已無德不報爾勿
怠於懋官各振公才副茲多訓可

馮倜可祕書省正字制

勅五品子馮倜蘭臺圖書之府起家而預之自非有才孰
克處此以爾早服嚴訓實揚令名勵學檢身如恐不及成
爾嘉器富我士林俾授初資以漸清貫無忘詩禮之學以
益刊正之勤可

侍御史王仲連可起居舍人監察米崇楷可右補

闕制

勅朕嘗思古先哲王所以致理區中垂憲萬祀者蓋有史臣以記其過有諫官以弼其違或面諍於庭或舉書於冊故政令所及罔不化成而怠惰之心無自入矣將振斯典必求其人某官王仲連爰藉才能亟參秩序正已而率下盡節而向公某官米崇楷早負時名尋升閨籍佩韋以臨事慎獨以修身而並服豸冠或司綱憲或立朝多按劾之奏或典刑有欽恤之心叶我懋章宜升右掖勉修官業以

副簡求直筆正言無有所諱可

水部員外郎判刑部查文徽可侍御史知雜制

勅秦漢以御史掌四方之記我朝以雜端正百官之邪其名則同所職實重副是慎選其惟通才某官查文徽克負美名早從交辟尋陟郎署升爲王臣法讞之難俾其參決而察情無不當持議無不平俾上絕濫刑下知恥格率是幹用使持憲綱在能振舉霜威肅清朝序爾其直躬而處衆正已以當官糾謬繩愆無或顧避陟明有典可不懋哉可

左常侍張義方可勤政殿學士制

夫珥金貂直騎省以備顧問非不重也而文學之選宜又加焉某是號名儒久登華貫臺閣踐歷聲實相符侍極以來當官無撓朕祇奉先烈勤求大中諮訪闕疑藉爾稽古特加近職以示開懷順美弼違無忘讜直

楚州刺史劉彥貞可本州觀察使制

勅懋官之旨非增秩不足以示寵行邊之任非進號不足以申威施之其人是爲令典某寬厚得衆深沉有謀克荷家聲累膺朝寄百城觀政三郡底寧而長淮上游地雄師

衆刺舉之職未極當官廉問之稽實諧僉議因是數寵更
佇厥成噫千里之長三軍之帥任遇斯重勲庸是圖爾其
敬哉無隳乃力可

外祖母追封某國夫人制

勅昔帝欽明義先敦序九族旣睦萬邦以懷矧乃推自某
之恩疏漏泉之澤有光茂典式表孝心外祖母李氏麗德
坤儀垂訓內則儲慶漸生民之什顯魂開石窹之田庶子
眇躬弗忘祇凜而嗣膺鴻業若涉大川奉長樂以自寧過
躍龍而軫念追遠之數宜有加焉是用進啟大邦載崇懿

號昭示戚里知予永懷可

大理卿判戶部刁紹可工部尚書制

勅周禮六卿皆有軍政漢制尚書奏事禁中歷代親重也如是今予有命亦屬其才某官刁紹始以幹能屢恭繁劇向由卿寺踐歷省垣制國用而無違登生齒而有羨丕顯成績是爲才臣今朕祇嗣丕圖永懷司會俾率諸吏表於南宮爰陟冬卿式申慶澤爾其欽承彝訓修舉官司無忘克終以忝殊渥可

兵部侍郎張義方可左常侍制

勅某珥貂服冕侍從獻替騎省之任也必以儒學大僚端
方名士入膺茲選允叶懋章而爾義方可謂能矣踐歷臺
省抑揚聲實純誠直道造次靡忘今予眇躬嗣守丕訓弗
惠厥德思聞讜言乃均慶恩命爲常侍從容左右敬佇嘉
猷爾其念哉無渝乃節可

太常少卿李貽業可宗正卿制

勅先王睦親九族必求宗正之賢者朝行之名臣爲之表
儀序其昭穆今我有命時惟舊章某官貽業學以潤身文
以行禮貞以幹蠱直以事君有一於此是可嘉尚矧備四

者非所謂名賢乎今朕嗣續丕基敷遵慶澤是用選於掌樂爲我司屬使吾宗室有信厚之風非貽業而誰勉修厥官無忝多訓可

水部郎中判刑部蕭儼可祠部郎中賜紫制

勅某官蕭儼夫王者之爲政也任能舉直理刑懋功如斯而已矣今秋官卿佐皆闕爾儼實專其司定法察情克舉攸職切言直氣屢聞於朝靡私厥躬何其愛朕之深也方將圖効適屬均恩是用就升名曹仍加命服俾擢省闈時予寵章爾其念哉無易乃心無回乃行決獄以寬簡當官

以公平一心克終子慎嘉汝可

屯田郎中李景進可工部郎中制

勅某官李景進昔漢館陶公主爲子求郎而不得何者非
其人也今汝景進亦吾外戚而謹愿儒雅好學善言久爲
臺閣頗副時望故均慶澤擢轉名曹彼漢推公而吾獎善
兩得其道不亦宜乎

大府卿張援可司農卿兼大理寺事制

書曰任官惟人又曰惟刑之恤朕服斯道因舉而行某官
張援爲性端方處衆和雅貞亮足以幹事哀矜足以得情

亟更攸司弗易時用因子有慶期爾盡才命爲大農俾掌
廷尉於戲庶獄之慎不可忘也畢辭而行不可爲也平反
伏念夜思晝行尚於措刑體我求理敬之哉

權知江都令李潯正授制

勅四京令之重也其選惟一是一必試可以進之均慶以寵
之蓋欲慎厥官而安其政也某官李潯屢爲長吏綽有能
名東夏之理不易其操事簡俗便予甚多之爰用加恩俾
從真授勉欽朝獎無懈乃心可

和州司馬潘處常可金部郎中制

勅先王之制官刑也過無所隱其肆大眚也善靡有違無私之義於是乎在某早服時望亟更臺郎子在東朝列於賓席旋貳廷尉實奉邦刑偶違伏念之言遽貽一點之命今朕祇嗣丕業誕敷慶恩豈以職事之愆遂忘罇俎之舊是用召自近郡陟於南宮勉承寵光以永無咎可

浙西判官高越可檢校水部郎中賜紫制

勅王者之建藩輔也必命重臣以臨之又擇賢士以佐之政成當遷畱而增秩古之制也高越以儒學淹雅見稱於時頃自南宮直於東觀筆削之言方勵弓旌之禮是求從

事大邦率多婉畫有嘉令望爰屬慶恩俾假正郎仍紆紫綬服我加等之命無懈盡規之心

安陸郡公景達檢校司空太府少卿制

勅夫太上立德其次親親能兼之者鮮矣惟是具美屬於我朝某孝友資身貞幹爲質守樞機而無悔居富貴而不驕藹然善聲成此嘉器朕肇襲丕業廣覃慶恩矧有名臣近在宗屬是用假以空上列於亞卿仍進崇階併示優寵於戲行爲民則爾其忽忘愛克厥威朕不敢尚服我多訓永揚令圖

保定郡公景迪可朝散大夫檢校左僕射賜紫制
勅朕厯選列辟見其睦親名器之難必當慎簡信不可私
於其屬也故我疏寵務先推公保定郡公景迪靜惟端方
動必孝敬佩服師友之訓成信厚之風宗室之間聞望尤著
屬我嗣服之始叶於立慶之恩爾其率循令猷惠迪前列
勿驕勿惰以永乃成

右拾遺鄭延樞可清江縣令賜緋制

勅夫邑令之有聲者入奉清列諫官之滿歲者出宰百里
蓋朝廷憂民立政之意也某官早厯宦緒無廢官常擢參

禁垣克服彝憲而南楚大邑長吏尤難命自周行往宣朝
旨仍加朱紱以示殊恩無易乃心勉修所職

浙西判官艾筠可江都少尹制

勅天下之大建親分陝以尹之東夏之重選能設貳以維
之茲用安民而政舉也某官艾筠識量純素學術通明奉
我東朝周知其善輟借侯幕載揚令名海隅之康筠有其
力夫以亞尹之難如彼而有適用之才若此俾膺慎選不
亦宜乎勉勵公方更施勤績

閩度可江寧府參軍制

勅鄉貢明經閬度士子起家而預清級者蓋亦有之自非
才地兼茂則不能光朝命而叶時論矣以爾名父之子自
強不息學業履行實浮於名屬予出震之初成我多士之
世俾掾天府以漸亨衢無忘益恭更揚令問

欽定全唐文卷八百八十目錄

徐鉉三

舒州司馬李景述可虞部郎中制

江州判官趙丕可司農卿制

江西推官成幼文可主客員外郎制

洪州判官袁特可浙西判官制

洪州掌書記喬匡舜可浙西掌書記賜紫制

知雜御史查文徽可起居郎樞密副使制

潤州丹徒令顧彥回可浙西推官制

撫州刺史周宏祚可池州刺史制

吉州判官鮑濤可虔州判官制

給事中閻居常可金紫檢校司空充廬州節度副
使制

虞部員外郎史館修撰韓熙載可太常博士制

虞部員外郎史館修撰張緯可句容令制

浙西判官高越可水部郎中制

左監門將軍趙仁澤可寧國軍都虞侯制

左司郎中高弼可元帥府書記制

左領軍將軍孔昌祚可泗州刺史制

水部郎中方訥可主客郎中東都畱守判官制

祕書郎田霖可東都畱守巡官制

前山陽縣尉張師古可祕書省校書郎制

江州錄事參軍王崇昭可江西觀察衙推制

前舒州錄事參軍沈翺可大理司直制

前舒州刺史李匡明可中書侍郎制

歙州觀察推官翟延祚可水部員外郎制

大理司直唐顥可監察御史制

禮部員外郎馮延魯可中書舍人勤政殿學士制
筠州刺史林延皓責授制

封保寧王冊

蔣莊武帝冊

追封安王冊

追封豐王冊

衛王劉仁贍改封越王冊

慶王進封陳王贈太尉冊

追贈劉

一作

從効父冊

追封許國太妃冊

欽定全唐文卷八百八十

徐鉉 三

舒州司馬李景述可虞部郎中制

勅王者用士其要惟公苟得其才近親何避某官李景述承茂勲之後秉素士之風頗有美名聞於戚里郡丞之任爲久臺郎之位爲宜俾䟽慶恩改授清級無忘師友之訓以奉朝廷之儀

江州判官趙丕可司農卿制

勅王者之正百官也黜其有過其肆大眚也許以自新則

邦典行而朝恩浹矣某官趙丕謹行以處衆克勤以在公
臺省踐更誠心不替故先皇獎用寄以準繩而靡達官常
自罹常憲朕纘承鴻業廣布慶恩以其久列班行偶因迷
謬特申渥澤俾授正卿勉勵乃心佇揚令望

江西推官成幼文可主客員外郎制

勅諸侯之佐命於朝廷而治績有勞奏課稱最者則當升
閨籍補爲省郎蓋勸能取士之旨也某從事大鎮於茲累
年本以誠明濟之通敏論不阿諂政無頗邪一方允釐爾
實有力今予寵爾以立朝之位命爾以司藩之官爾其敬

哉無忝我陟明之典

洪州判官袁特可浙西判官制

勅袁特朕以關輔之大控制要津出保傳之重鎮之以屏
王室擇賓從之賢佐之以齊政經而特尹縣神州理甚簡
便運籌盛府言必端詳叶於簡求宜授斯任夫潤之民固
與洪無異而爾之操當與初不渝則官業允釐而朝獎無
替矣敬服斯訓往勵乃司可

洪州掌書記喬匡舜可浙西掌書記賜紫制

勅喬匡舜朕以師傳之重敬而不違式遂便安俾臨關輔

而軍旅之事不可無佐奏記之任不可非才聞匡舜以高
文受知以直道從事厯歲斯久宏益居多故因其賓席之
資加以紫綬之貴改轅東適從吾上公無替初心以忝朝
命

知雜御史查文徽可起居郎樞密副使制

勅秉記言之筆以侍左右受司聰之寄以典出納並居二
職其可非才某官查文徽儒雅表文忠厚成質早踐華貫
時爲名臣以南宮清望之資當憲府雄極之任提綱有序
而衆目以理正身自處而周行以清物論與之予用嘉尚

居中理極不亦可乎噫爲朕腹心注人耳目執節一懈悔咎隨之爾其慎之無忝吾命可

潤州丹徒令顧彥回可浙西推官制

勅長人之吏親職爲勞觀風之佐坐籌爲異均其所任是曰優恩某官顧彥回以清節士風嘗恭王府以耆年篤行出字齊民課績尤異自當優寵驅馳州縣非爲所宜俾陟賓階奉我元老優游盛府足以光華

撫州刺史周宏祚可池州刺史制

朕以將復淳風務先理道思得良二千石以安吾民倘副

簡求迭受大郡斯蓋布政懋官之旨也某官周宏祚勲臣之子雅有父風自服佩恩華踐更事任訓齊武力能得士心緩懷邊戎克壯兵畧俗阜秩滿序勞當遷朕觀其才可謂良矣青陽名郡控制中流前所任者咸屬重望今以授爾爾其欽哉進爵升階式示兼寵苟勤節弗易池人來蘇考績策勲吾有彝典

吉州判官鮑濤可虔州判官制

敕虔之爲鎮俗雜地廣化不可一時生寇攘萑苻旣平閭井思乂可以佐吾良帥而寧吾齊民者亡聞某官鮑濤久

俸列郡克舉官常從政以和理劇無滯况虔吉鄰郡聲績
素彰便道之官率舊爲用副茲慎選誰曰不然爾其敬承
無忝明訓

給事中間居常可金紫檢校司空充廬州節度副
使制

勅王者推念舊之心申優賢之旨官序出處從其所安諒
不可滯於一方也某官間居常執心沖粹爲學精博修賢
人之業多長者之言粵子纂承實重舊德俾掌駁議直於
瑣闥而無妄之疾未痊貞退之請彌切重違誠願抑此朝

恩俾佐藩方式便頤養金印紫綬邦土憲司併申寵光以示優渥陟明之典當俟有瘳可

虞部員外郎史館修撰韓熙載可大常博士制

勅某官韓熙載朕以因心之感同軌有期嚴恭禋祀仍從此始求所以節豐儉而振廢闕者屬於禮官慎選其人必在時彥以熙載學問精贍辭氣亮直本以通識濟之奇文惟名與實咸副是命故輟自東觀列於曲臺使代稱禮樂之盛吾實有望於爾勉之哉

虞部員外郎史館修撰張緯可句容令制

勅爲政之要在乎安民長人之吏在乎慎選故吾用古道
擇尚書郎而命之某官張緯學問該通辭藝精絕自東朝
載筆石室抽文朝論藹然以爲名士矧又洞識理體周知
物情是爲通才何適不可王畿大邑旣庶而富藉爾敏惠
爲吾教之仍假臺郎以申朝獎苟聞報政豈恡加恩可

浙西判官高越可水部郎中制

勅多士之世副臺郎之選者前代謂之賢乃知三署之屬
例無輕授某官高越早踐朝序嘗爲史臣當官有聲聚學
不倦頃屬上將出臨大藩輟參入幕之資備觀理劇之用

府罷赴闕時名益高司川之秩俾從直授無忘職業以荷朝恩

左監門將軍趙仁澤可寧國軍都虞侯制

勅南藩之寄宣城爲最師勁而衆地近而雄故朝命列授以貳軍事所以重其威令也某官趙仁澤名將之子頗有父風在軍積年武畧精練出宰大邑歸預禁營副予簡求俾隸宣部往綏乃績無替前勞

左司郎中高弼可元帥府書記制

勅某官高弼王者之用師也必先以文告之命訓誓之辭

故戎車之往記室爲重而朕前委愛弟實司邦政今命汝
弼使典軍書任才責功其意斯在矧弼嘗參西掖尋履南
省所厯之任藉藉有聲今能奮雄辭而塞慎選陟明之典
予豈忘哉

左領軍將軍孔昌祚可泗州刺史制

勅左領軍衛將軍甲仗宮城營造等使孔昌祚朕以長淮
北偏隔閔戎夏惟彼泗口實當要衝凡爲守臣罔不慎選
而昌祚以貞幹事以勤懋德周廬巡徼之政宮禁繁劇之
司董齊典理靡有違者厯歲且久秉心不渝朕觀其才可

爲邊將授以符竹付之臨淮爾其揚我武威修乃郡政登於考功之籍以塞任能之恩可

水部郎中方訥可主客郎中東都畱守判官制

敕某官方訥朕以分陝之任非親賢不可故迭用子弟以居守復以佩觿之齒唯訓導是務故慎選名德以從行而朕在東朝先皇命爾訥列我賓席恭慎文雅挹其風度將順規諷揖其忠誠尋又奉予愛子益固是道今所授任非訥而誰客曹正郎畱臺幕職往示兼寵爾其敬哉乃心不渝懋典寧志

祕書郎田霖可東都畱守巡官制

勅某官田霖朕命愛子表正東夏管記之任罇俎之間唯才與行乃可是選而朕在儲貳則嘗知霖文藝直心綽有餘裕累參載筆之任近登祕籍之司列於王宮頗叶時望故授以畱臺之職副茲託乘之求爾往敬哉無忝予命

前山陽縣尉張師古可祕書省校書郎制

勅王者之行慶也獎能振滯赦過責功如斯而已矣某前爲縣佐以公事罷免而聞其立身修已有足多者故從其滌瑕之命升諸祕籍之司往服乃官勿重而悔

江州錄事參軍王崇昭可江西觀察衙推制

勅某官王崇昭西南大藩庶政繁會獄訟之理欽恤是先
重輕一隳手足無措必得朝士以典掌之而聞崇昭可當
斯任往莅乃職無忘益恭

前舒州錄事參軍沈翺可大理司直制

勅某蔭藉從仕以儒術資身蓬閣曳裾早揚聲問侯藩載
筆亦懋勤勞向事主符實司經紀州縣之職非其所長既
失儀刑遂從罷秩今慶賞斯浹一眚咸矜復爾名籍俾參
棘寺吾不記過爾其自修

前舒州刺史李匡明可中書侍郎制

勅朕以不德恭承丕基思聞獻替之言以自開悟故於侍從之列尤用簡求矧乃職奉詔命地參公輔歷代精選可虛授乎某以風度爽邁克嗣遺允以文章宏雅累踐清途先皇器之任遇尤重故其冠翰苑掌天官長憲臺肅千里靖恭於位績用有成舒人旣康執璧來覲宜加疏等之命擢爲鳳閣侍郎敬之哉夫出爲諸侯非不貴也入首三品非無位也持重足以鎮物納忠足以報我匡正不逮予有望焉

欽州觀察推官翟延祚可水部員外郎制

勅某以外諸侯吏入爲尚書郎者非推恩酬勞何以臻此
聞爾宰百里佐廉車皆有政能宜當選任往祇乃事無忝
予恩

大理司直唐穎可監察御史制

勅某夫御史之列皆一時之清選而貴仕所由漸也聞爾
執心有常從事以直持刑甚平允當官有勤勞故升諸朝
廷俾之察視爾其懋乃才用修我紀綱無傾側糾訐以爲
能依阿顧避以自守勿貽爾悔以忝予恩

禮部員外郎馮延魯可中書舍人勤政殿學士制
勅侍從無職總同清要若乃參書殿之列備切問之重使
如綸之命式光人文無詢之言不入吾耳所寄若是其選
可知某惟望與才皆副是任况東畿亞府有理劇之用南
宮禮典多伏奏之勤俾膺簡求必叶虛佇夫前言往行爾
所祇服正辭讜論予之嘉聞無從非彝以忝多訓

筠州刺史林廷皓責授制

勅恥過作非言不顧行爲臣如此在法難容某頃自歸朝
頗推有勇俾之爲將所以圖功及封疆多難之時車徒四

出之際遂能激揚壯節措之師旅付以圭符而畏懦屢聞遁逃不服震驚城守詿誤軍謀當此之時已宜行法予以義深罪已功在止戈旣屈身以弭兵乃含垢而務德復移郡寄仍綰使權苟奏課之有聞亦在人而何棄未終考績爰投訟辭猶且累上素章屢言構陷洎遣制使明徵其辭乃自滁陽罷郡已來筠州移郡之後侵漁公帑積數且多干犯詔條爲罪不一證據明具詞理並窮殊不省非更爲文過謂競廝養爲恥以對獄官爲羞欲蓋彌彰侮我何甚其武勇也旣如彼其誠心也又如此倘猶宏恕何以律人

尚以君臣之間務全終始特從薄貶庶克自新勉荷寬恩
無重而悔

封保寧王冊

維保大元年八月丁未朔某日皇帝若曰稽古夷庚祇叶
皇極建侯樹屏保乂王家用能乘運會昌厯世重光先哲
所以啟後列辟所以時憲者也我思立愛宜有加焉咨爾
二十弟某中和萃靈寬裕成德戲必俎豆之禮學無城闕
之游聰明仁智仰遵前訓孝友姻睦率由生知昭此玉音
應於麟趾朕以不德凜乎丕承文武之功期無獨享契龜

胙土抑爲舊章今使某官某持節冊爾爲保寧王食邑二千戶敬之哉昔我文考對越上帝敷佑下民克儉於家無縱於逸再造之業與世無窮予以爾有邦膺受繁祉今爾尚迪遺烈保終令圖無從非彝無狎非正耆老是聽訓典是師綏寧乃封以永元吉

蔣莊武帝冊

維年日月皇帝若曰稽古皇極訓民事神詔大號以崇正直之威垂大名以紀昭明之德性幣有數典禮不愆政是以和神降之福莫不由斯者已若乃以死勤事沒而不朽

流光儲祉蔣帝有焉惟帝冥符靈氣孕毓元造嘉猷雄畧
昭映前人在昔潛耀大川躍鱗下邑著艱難之節所以事
君彰變化之神所以顯俗惟德是輔感而遂通建福會昌
以戡時難豐功厚德以享帝郊史臣執簡於無窮工祝正
辭於不絕顧惟寡昧祇嗣龐鴻敢忘人謀以叶靈貺瞻言
神岳作鎮皇州興運維新積符丕顯而位極於炎昊名謝
於康惠墜典未舉予用慊焉濮陽諸姬實纂服之舊邦尅
亂除害乃庇人之盛業合爲縟禮申告祠庭今使使某官
持節奉冊追謚曰莊武帝嗚呼丹青懿烈光光如彼簡冊

廟貌昭昭如此永爲民正無乏神主之望焉

追封安王冊

維年月日國主若曰稽古大猷啟迪來裔藩翰之寄重事也不以親屬爲嫌寶玉之分盛典也不以死生易節昔在有魏蒼舒早世降及我唐子雲無祿咸用追啟王社飾於泉扃垂爲憲章肆予遵舉咨爾某稟信厚之德持謙下之資在傳不勤爲善最樂烝烝敬孝之性恂恂友悌之風及苴茅北藩授仕殿省別六尚之名物參九伐之政令行以正直持之公平諸御知方羣校競勸職修事舉朕甚多之

爵止極於公封位未登於六事流光不待時望慊焉申予
有慟之懷加爾飾終之禮冬卿峻秩楚澤全封丕舉茂章
永光餘烈今命使某持節冊贈工部尚書封安王嗚呼延
吳之懷予用多愧間平之德人其識諸簡冊無虧丹青不
泯昭昭後魄亦克知之

追封豐王冊

維年月日國主若曰名器之重典冊之崇不以親疎爲嫌
至公之舉也不以生死易節歸厚之道也先哲彝訓我儀
行之咨爾某挺岐嶷之咨稟山河之秀亦旣就傅時惟老

金史卷之三
成迪祖宗之猷不愆不忘奉詩禮之學惟幾惟勤公室所
推藩屏攸寄秀而不實彫此妙齡天性所鍾永悼何已真
王異數護塞雄藩舉爲寵章飾彼幽壤今使使云云嗚呼
分以寶玉苴以白茅弗及圖功猶足表德尚爾不昧知予
此心

衛王劉仁瞻改封越王冊

維年月日國主若曰忠臣之事君也歿且不朽王者之念
功也久而弗忘故賢哲應期風烈所及千載之下若旦暮
焉矧先朝舊臣藩方賢帥雄名大節震耀區中粵子纂承

敢忘褒寵咨爾故某命世英傑奕葉勲庸便藩寵遇茂著
聲實間者輟自離衛鎮於壽春導德申威罔不率俾國步
中梗邊烽載驚介然孤城橫制險地威畧所奮以戰則靡
亢恩信所加以守則彌固社稷是衛豈惟封疆嗚呼壯圖
中奪而英氣動於二國奇表長謝而中規流於百代肆我
文考爰極寵章崇爲帝師建以王社大名備物無不及焉
咨予小子敬想先正聞聲之感斯極飾壤之禮未行是用
越於彝章再光贈典山陰大國會稽遺墟申畫四封永旌
懿烈今遣使某官持節改封越王嗚呼忘身徇國其至如

彼慎終追遠其厚如此永錫繁祉子孫保之

慶王進封陳王贈太尉冊

維年月日國在若曰古稱王者之貴必有先也豈不以在
原之助義切於邦家陟岡之恩情均於存歿自非贈飾之
寵寧申敦敘之懷稽迪前經式揚盛典咨爾某受天正氣
爲國宗英器量川停機神秀出縱橫之智發爲事業儒雅
之度播爲文辭自錫壤侯藩調兵蘭綺行令惟一撫下惟
仁周廬不驚宸極甘寢天覆形於鍾愛時望極於維城景
命不融儀表長謝壯圖大畧嗟時運之難并遺文餘烈綿

歲序而常存粵子小子祇荷丕緒奉慈訓於長樂頒分器
於懿親友于之恩追懷何已是用修嚴緝禮申告九原以
王有文雅之稱故改封於陳社以王有重厚之器故建號
於上公光昭令猷永垂不朽今命使某云云噫花萼之游
宛成今昔寶玉之數遂隔平生尚想明靈鑒茲永悼

追贈劉一作雷從効父冊

維年月日國主若曰立身揚名君子所以顯父母也慎終
追遠王者所以厚風俗也政之大者其可忘乎咨爾清源
軍節度使劉某父贈鄜州都督彥雄行當於躬量韜於世

修誠明而應物積善慶以流光實啟高門誕生賢嗣建節
風雲之會致身藩翰之權清寧一方表率羣后歲勤職貢
恭守朝經位崇帝師勲在王府向非稟訓有自應期而生
則功勲所昭何以及此雖褒贈之典已賁於九原而督護
之名未比於大府俾加緝禮薦洽朝章今遣使云云持節
冊贈爾爲潞州大都督嗚呼節鉞之貴命屈於生前典冊
之崇禮符於不朽旣足以先爾之有後亦所以表予之推
恩昭昭有靈知我斯意

追封許國太妃冊

維保大三年太歲乙巳七月乙未朔某日皇帝若曰昔在
祖后法象天明旁求淑女式敷陰教並建內職以麗外朝
故其先德之舉顯魂之命比爰庶尹無不及焉蓋敬終貽
後之旨也咨爾故汝南郡君周氏恭儉執中明智資性頃
諧法相入奉先朝絃綖之勤夙著於彤史湯沐之寵竟飾
於泉扃粵予纂承祇稟茲訓家道旣正國風以理仰蹈成
式永懷舊人是用釐舉闕遺追崇名數昆吾舊宅太岳全
邦申畫四封以光懿德今使某官持冊封許國太妃嗚呼
令問不忘盛典無替昭昭復魄聞予此言